

CALYPSO Y SU DESARROYO NA ARUBA FOR DI AÑANAN 30

Ultimo dos dianan, mi a wordo acerca na varios ocasion pa duna un descripcion di calypso, su historia na Aruba y di con e ta na Aruba etc. Pa hopi aña caba mi ta dunando informacion na muchanan di school cu ta traha nan scriptie pa school, y anualmente ta cantidad di estudiante ta busca esaki.

For di e scriptie cu mi a entrega for di 1998 y cu mi a programa den computer, mi lo usa un resumen aki pa splica di calypso na Aruba. E historia di calypso ta largo, pesey mi ta usando aki un resumen.

(1)----**Calypso ta un ritmo y na mes momento tambe cancionnan**, cu a surgi for di e influencia Afro-caribense den Caribe, principalmente na Trinidad.

E ta coro y versonan ,acompaña pa un banda musical, treciendo dilanti comentarionan satirico, social y politico, y conta di entre otro amor, escandalo, historia y sucedidonan den comunidádnan.

Calypso a origina for di siglo 19 na Trinidad cu e influencia africano. Catibonan tabata traha cancionnan critico riba nan doñonan, riba sociedad y eventonan, dunando tambe mensahenan relaciona cu emancipacion y opresion.

Na Trinidad e trahadornan di calypso, e compositoran cu na mes momento tabata cantantenan, **tabata ser yama "Chantwells"**.

Calypso a pasa den diferente etapa ,cu ta e etapa prome cu comienzo di e siglo aki, te comienzo di prome guerra mundial.

El a pasa den e etapa despues di prome guerra mundial (cu cancionnan basa hopi riba e guerra y sucedidonan mundial), y e etapa despues di e di dos guerra mundial.

Den e etapa aki tambe tabata canta riba sucedidonan durante **guerra mundial**, sucedidonan na **Etiopia cu atake italiano (1935)**, tambe lantamento di fascismo cu a conduci na **guerra civil spaño (1936)** y e **nazismo di 1939 pa 1945**.

Esakinan a ser canta den calypsonan di Trinidad ya cu e compositoran y cantantenan tabata considera e gueranan aki **racismo** riba gran escala. Paisnan poderoso cu ta abusa di e debilnan preto y e nazinan cu a sinti nan mes mas poderoso cu tur otro na mundo.

(2)---**Calypso a cumenza bira conoci na Aruba** den e periodo prome y despues di e di dos guerra mundial.

Introduccion di calypso a bini di e trahadornan di **Trinidad, British Guyana, B.G., (awe Guyana) y di islanan ingles y di islanan Ariba**, cu a bin traha na Aruba den añanan 30.

Na final di decada 40 por bisa cu e calypso a cumenza drenta e comunidad aki mas fuerte, principalmente na San Nicolas (Village, Bachelor's Quarters y Labour Camp (na Lago Height) y den Lago Heights mes, y plama pa Golf y Rooi Hundo y di Village pa Zeewijk.

Tempo Reina Elizabeth II a wordo corona, e roadmarch "**Reign Queen Elizabeth**" a bira masha popular na Aruba, y tambe e roadmarch "**Deo Deo**".

E temponan ey 1948 pa 1950, nombrenan di **Mighty Sparrow, Kitchener, Atila, Lion, Lord Melody** a cumenza zona tur caminda, pero cu **Sparrow, Kitchener y Melody** como esnan mas popular, te cu Sparrow a bira conoci como rey di calypso, titulo cu te awe e ta carga.

(3-a)**Den nos cultura (arubano) Calypso no a forma parti.**

Ta despues cu den carnaval a cumenza cu e concursionan di Calypso, esaki a cumenza penetra den nos cultura y awe mescos cu carnavál, ta forma parti di cultura.

Ta solamente den temporada di Carnaval calypso tabata bin dilanti como tradicion di musica di carnaval di añanan 40 cu steelbandnan, y despues cu a cumenza cu concurso di calypso na 1964.

(3-b)**Calypso a bira parti di nos carnaval for di entrada di steelbandnan fin di decada 40 comienzo di decada 50.**

Steelbandnan tabata ocupa nan mes cu Roadmarch (cu ta un forma mas lihe di calypso) y **calypso** y pa fiestanan social cu steelband (cu stage-pans) nan tabata varia esaki cu merengue y bolero.

Pero calypso cu nos conoce awe den nos concurso di Calypso, a haci su entrada den carnaval cu e **prome calypso contest na 1964**.

(4) Por menciona **SAC y ASOMA**. SAC ta organizador di concursionan di calypso y roadmarch y for di 1984-1985 ASOMA a cay aden, e tempo ey den forma di un chantage fini, cu si ASOMA no haya participacion, bandanan y musiconan ta hala atras. SAC A sucumbi, y ASOMA a cumenza participa tambe den e actividad aki te cu awe.

Sinembargo, ta e bandanan musical y e cantantenan ta mas importante. SAC ta djies pone un fecha, percura pa e organizacion y ASOMA ta encarga cu inscripcion di bandanan y cantantenan y hinca e anochi den

otro. Fuera di esakinan no tin ningun instancia importante mas.

(5) **Roadmarch, Soca, Reggae**, tur ta deriva di e ritmo di calypso y tur por wordo considera como calypso, ta djies e ritmo ta varia. E cambionan ta bini mas bien cu evolucion di tempo y modernismo. Te cu 1998 ritmo di calypso por ser parti den como 8 diferente tipo, di suave te cu ritmo di roadmarch.

(6) E ta un atraccion pasobra e ta tuma lugar den un temporada di fiesta y di gozo. Pone concurso di calypso riba cualquier otro fecha den cualquier otro temporada cu no ta carnaval, y e no ta nada.

Ni atraccion turistico e no ta pasobra ta un man yen di turista ta bin wak calypso, pasobra nada di promocion den sector turistico no ta ser haci pa esaki, pa atrae e gross di bishitantenan cu ta riba e isla e dianan ey. **E por bira atraccion turistico den temporada di Carnaval si tin un bon equipo di promocion su tras den e direccion aki.**

(7) **Esnan cu ta involvi cu un calypso**: pa lirica of texto bo ta haya e escritor of e compositor (den hopi caso ta e cantante mes); un compositor di e cancion, (den hopi caso e cantante mes); un areglista, e banda musical cu su musiconan y e cantante.

(8) Ta sali for di e punto di bista cu tur participante y esnan involvi den e calypso sa kico e calypso ta.

Ta huzga articulacion, si e tono di voz ta zuiver/limpi, si e ritmo tin bon sla di calypso (awe si e tin bon sla di soca/calypso y hasta e ritmo di jamback ta conta) riba e instrumentonan; si e coro ta limpi y den harmonia; si tin creatividad; si e letranan no ta ofensivo pa ningun grupo, persona o instancia y si no tin vulgaridad; y si e contenido y melodia ta den ambiente di carnaval.

(9) E cantantenan mas fama ta esnan menciona ariba, **Sparrow, Kitchener, Melody, Atila, Lion** cu ta esnan **legendario**, hunto cu un **Lord Nelson**.

Na Aruba por menciona **Lord Cobashi, Paul Connor (King Paul), King Poncho, Lord Boxoe, Young quick Silver, Ray Anthony**

Thomas, Mighty Talent, como esnan mas grandi como cantante-y compositor.

Como compositor por pone acerca **Ramon Sharpe** cu ta un di e compositoran mas renombra y grandi di calypso di nos isla. Di esnan mas hoben y prominente hunto cu **Claudius Philips**, no por keda sin menciona e compositor **Anthony Gario**, cu algun vez ta hasta cantante, cu ta conoci pa su renobacionnan y creatividad musical. E ta ser considera como e genio sin reconocimiento.

E prome cuatronan a lanta den calypso y steelband, ta musiconan conoci, dirigentenan di banda. **Young Quick Silver y Mighty Talent a sali for di cuna di Lord Boxeo** cu mas bien tabata nan padrino di calypso.

Lord Cobashi a lanta mey mey di calypso, compone y canta como e rey pa hopi aña riba nos isla, sin nunca a resulta rey den concurso, pero semper considera como **"e grandi"**.

Mighty Talent ta musico, compositor, areglista y cantante mas hoben di e grupo, sinembargo esun mas exitoso tambe, sigui pa Gario como e compositor mas creativo musicalmente.

(10) Calypso ta un buki di historia di nos isla for di 1964 pa awe, y nos concurso di calypso ta un buki di historia cu su capitulon tur aña.

Si bay tras di letranan y titulonnan di tur calypso for di 1964 pa awe, lo ripara cu nan ta relata loke a pasa riba e isla e aña anterior y principio di e aña na vigor. **Pesey tambe calypso sa wordo yama "The people's Newspaper"**.

(11) Esnan cu kier pasa ratonan placentero mey mey di conocirnan y bon ambiente musical y cu kier goza y balia mey mey di un massa libremente, ta asisti na e concursionan. Hendenan cu ta buscando **"a good time"**. Naturalmente hopi di nan ta pasa como fanaticonan di cierto banda musical of cantante, pero por a bira fanaticonan tambe di cantantenan cu e aña anterior a sobresali. E anochi final nan ta bira fanaticonan di esnan cu nan ta considera e participantenan cu e calypsonan mas impactante y roadmarchnan mas fuerte.

No ta explicitamente cu esnan presente ta fanaticonan di bandanan, di calypso, di roadmarch of di cantantenan. Nan ta bay pa e actividad y su ambiente carnavalesco.

Esaki en corto algo riba e historia di Calypso, principalmente su desarrollo na Aruba.

Juby